

0.0.1 tevijjasuttam (excerpt)

1. evammesutaṃ: ekaṃ samayaṃ bhagavā kosalesu cārikaṃ caramāno mahatā bhikkhusaṅghena saddhiṃ pañcamattehi bhikkhusatehi yena manasākaṭaṃ nāma kosalānaṃ brāhmaṇagāmo tadavasari. tatra sudaṃ bhagavā manasākaṭe viharati uttarena manasākaṭassa aciravatiyā nadiyā tīre ambavane.
2. tena kho pana samayena sambahulā abhiññātā abhiññātā brāhmaṇamahāsālā manasākaṭe paṭivasanti, seyyathidaṃ: caṅkī brāhmaṇo, tārukko brāhmaṇo, pokkharasāti brāhmaṇo, jāṇussoṇī brāhmaṇo, todeyyo brāhmaṇo, aññe ca abhiññātā abhiññātā brāhmaṇamahāsālā.
3. atha kho vāsetṭha-bhāradvājānaṃ jaṅghāvihāraṃ anucaṅkamantānaṃ anuvicarantānaṃ maggāmagge kathā udapādi. atha kho vāsetṭho māṇavo evamāha: ‘ayameva ujumaggo ayamañjasāyano niyyāṇiko niyyāti takkarassa brahmasahavyatāya yvāyaṃ akkhāto brāhmaṇena pokkharasātinā’ti.
4. bhāradvājo māṇavo evamāha: ayameva ujumaggo ayamañjasāyano niyyāṇiko niyyāti takkarassa brahmasahavyatāya yvāyaṃ akkhāto brāhmaṇena tārukkenā’ti. neva khvāsakkhi¹ vāsetṭho māṇavo bhāradvājaṃ māṇavaṃ saññāpetuṃ. na panāsakkhi bhāradvājo māṇavo vāsetṭhaṃ māṇavaṃ saññāpetuṃ.

5. atha kho vāseṭṭho māṇavo bhāradvājaṃ māṇavaṃ āmantesi: ayaṃ kho bhāradvāja, samaṇo gotamo sakyaputto sakyakulā pabbajito manasākaṭe viharati uttarena manasākaṭassa aciravatiyā nadiyā tīre ambavane. taṃ kho pana bhavantam gotamaṃ evaṃ kalyāṇo kittisaddo abbhuggato: itipi so bhagavā araham sammāsambuddho vijjācaraṇasampanno sugato lokavidū anuttaro purisadammasārathi satthā devamanussānaṃ buddho bhagavā’ti. āyāma bho bhāradvāja, yena samaṇo gotamo tenupasaṅkamissāma. upasaṅkamitvā etamattham samaṇam gotamaṃ pucchissāma. yathā no samaṇo gotamo byākarissati, tathā naṃ dhāressāmāti. ‘evambho’ti kho bhāradvājo māṇavo vāseṭṭhassa māṇavassa paccassosi.

6. atha kho vāseṭṭhabhāradvājā māṇavā yena bhagavā tenupasaṅkamsu. upasaṅkamitvā bhagavatā saddhiṃ sammodimsu. sammodanīyaṃ katham sārāṇīyaṃ vītisāretvā ekamantaṃ nisīdimsu. ekamantaṃ nisinno kho vāseṭṭho māṇavo bhagavantam etadavoca: “idha bho gotama amhākaṃ jaṅghāvihāraṃ anucaṅkamantānaṃ anuvicarantānaṃ maggāmagge kathā udapādi. ahaṃ evaṃ vadāmi: ‘ayameva ujumaggo ayamañjasāyano niyyāṇiko niyyāti takkarassa brahmasahavyatāya yvāyaṃ akkhāto brāhmaṇena pokkharasātinā’ti. bhāradvājo māṇavo evamāha: ‘ayameva ujumaggo ayamañjasāyano niyyāṇiko niyyāti takkarassa brahmasahavyatāya yvāyaṃ akkhāto brāhmaṇena tārukkenā’ti. ettha bho gotama, attheva viggaho atthi vivādo, atthi nānāvādo”ti.

7. “iti kira vāseṭṭha, tvaṃ evaṃ vadesi: ayameva ujumaggo ayamañjasāyano niyyāṇiko niyyāti takkarassa brahmasahavyatāya yvāyaṃ akkhāto brāhmaṇena pokkharasātinā’ti. bhāradvājo māṇavo evamāha: ayameva ujumaggo ayamañjasāyano niyyāṇiko niyyāti takkarassa brahmasahavyatāya yvāyaṃ akkhāto brāhmaṇena tārukkenāti. atha kismiṃ pana vo vāseṭṭhā viggaho? kismiṃ vivādo? kismiṃ nānāvādo?”ti.

8. “maggāmagge bho gotama. kiñcāpi bho gotama brāhmaṇā nānāmagge paññāpenti addhariyā brāhmaṇā, tittiriya brāhmaṇā. chandokā brāhmaṇā, bavhiraṇḍī brāhmaṇā, atha kho sabbāni tāni niyyāṇikāni niyyanti takkarassa brahmasahavyatāya. seyyathāpi bho gotama gāmassa vā nigamassa vā avidūre bahūni cepi nānāmaggāni bhavanti, atha kho sabbāni tāni gāmasamosaraṇāni bhavanti. evameva kho bho gotama kiñcāpi brāhmaṇā nānāmagge paññāpenti addhariyā brāhmaṇā, tittiriya brāhmaṇā, chandokā brāhmaṇā, bavhiraṇḍī brāhmaṇā, atha kho sabbāni tāni niyyāṇikāni niyyanti takkarassa brahmasahavyatāyā”ti.

9. “niyyantīti vāseṭṭha vadesi?”

10. “niyyantīti bho gotama vadāmi”.

11. “niyyantīti vāseṭṭha vadesi?”

12. “niyyantīti bho gotama vadāmi”.

13. “niyyantīti vāseṭṭha vadesi?”

14. “niyyantīti bho gotama vadāmi”.

15. “kiṃ pana vāseṭṭha, atthi koci tevijjānaṃ brāhma-
ṇānaṃ ekabrāhmaṇo’pi yena brahmā sakkhi diṭṭho?”ti.

16. “no hidaṃ bho gotama”.

17. “kiṃ pana vāseṭṭha, atthi koci tevijjānaṃ brāhma-
ṇānaṃ ekācariyo’pi yena brahmā sakkhi diṭṭho?”ti.

18. “no hidaṃ bho gotama”.

19. “kiṃ pana vāseṭṭha, atthi koci tevijjānaṃ brāhma-
ṇānaṃ ekācariyapācariyo’pi yena brahmā sakkhidiṭ-
ṭho?”ti.

20. “no hidaṃ bho gotama”.

21. “kiṃ pana vāseṭṭha, atthi koci tevijjānaṃ brāhma-
ṇānaṃ yāva sattamā ācariyamahayugā yena brahmā
sakkhi diṭṭho?”ti.

22. “no hidaṃ bho gotama”.

23. “kiṃ pana vāseṭṭha, ye’pi tevijjānaṃ brāhmaṇānaṃ pubbakā isayo mantānaṃ kattāro mantānaṃ pavattāro yesamidaṃ etarahi tevijjā brāhmaṇā porāṇaṃ mantapadaṃ gītaṃ pavuttaṃ samūhitaṃ tadanugāyanti tadanubhāsanti bhāsitamanubhāsanti vācitanuvinācenti, seyyathidaṃ: aṭṭako vāmake vāmadevo vessāmitto yamataggi aṅgīraso bhāradvājo vāseṭṭho kassapo bhagu, te’pi evamaḥaṃsu: mayametaṃ jānāma mayametaṃ passāma yattha vā brahmā yena vā brahmā yaḥiṃ vā brahmā’ti?”.

24. “no hidaṃ bho gotama”.

25. iti kira vāseṭṭha natthi koci tevijjānaṃ brāhmaṇānaṃ ekabrāhmaṇopi yena brahmā sakkehi diṭṭho. natthi koci tevijjānaṃ brāhmaṇānaṃ ekācariyopi yena brahmā sakkehiditṭho. natthi koci tevijjānaṃ brāhmaṇānaṃ ekācariyapācariyopi yena brahmā sakkehiditṭho. natthi koci tevijjānaṃ brāhmaṇānaṃ yāva sattama ācariyamahayugā yena brahmā sakkehi diṭṭho -

26. yepi kira tevijjānaṃ brāhmaṇānaṃ pubbakā isayo mantānaṃ kattāro mantānaṃ pavattāro, yesamidaṃ etarahi tevijjā brāhmaṇā porāṇaṃ mantapadaṃ gītaṃ pavuttaṃ samūhitaṃ tadanugāyanti tadanubhāsanti bhāsitamanubhāsanti vācitanuvinācenti, seyyathidaṃ: aṭṭako vāmake vāmadevo vessāmitto yamataggi aṅgīraso bhāradvājo vāseṭṭho kassapo bhagu, tepi na evamaḥaṃsu: mayametaṃ jānāma mayametaṃ passāma yattha vā brahmā yena vā brahmā yaḥiṃ vā bra-

hmāti. te vata tevijjā brāhmaṇā evamāhaṃsu: yaṃ mayāṃ na jānāma yaṃ na passāma, tassa saḥavyatāya maggaṃ desema: ayameva ujumaggo ayamañjasāyano niyyāṇiko niyyāti takkarassa brahmasaḥavyatāyāti.

27. taṃ kimmaññasi vāseṭṭha, tanu evaṃ sante tevijjānaṃ brāhmaṇānaṃ appāṭihīrakataṃ bhāsitaṃ sampajjati?ti.

28. addhā kho bho gotama, evaṃ sante tevijjānaṃ brāhmaṇānaṃ appāṭihīrakataṃ bhāsitaṃ sampajjati.

29. sādhu vāseṭṭha. te vata vāseṭṭha tevijjā brāhmaṇā yaṃ na jānanti yaṃ na passanti tassa saḥavyatāya maggaṃ desessanti: ayameva ujumaggo ayamañjasāyano niyyāṇiko niyyāni takkarassa brahmasaḥavyatāyāti netāṃ ṭhānaṃ vijjati. seyyathāpi vāseṭṭha andhaveṇiparamparaṃ saṃsattā purimopi na passati majjhimopi na passati pacchimopi na passati, evameva kho vāseṭṭha andhaveṇūpamaṃ maññe tevijjānaṃ brāhmaṇānaṃ bhāsitaṃ. purimopi na passati. majjhimopi na passati. pacchimopi na passati. tesamidaṃ tevijjānaṃ brāhmaṇānaṃ bhāsitaṃ bhassakaññeva sampajjati, nāmakaññeva sampajjati. rittakaññeva sampajjati, tucchakaññeva sampajjati.